



**Finale Resultate Persverklaring vir Remgro Beperk
(Remgro)**

DIE MEESTE VAN REMGRO SE BELEGGINGS LEWER GOEIE RESULTATE

- **Wesensverdienste per aandeel neem met 20.3% tot 1 555 sent toe**
- **Totale dividend per aandeel vir die jaar neem met 10.0% tot 428 sent toe**
- **Intrinsieke netto batewaarde per aandeel neem met 17.5% tot R288.89**

Vir die jaar geëindig 30 Junie 2015, het die meerderheid van Remgro se onderliggende beleggings goeie resultate gerapporteer ten spyte van moeilike ekonomiese en handelsomstandighede. Die toename in wesensverdienste per aandeel is hoofsaaklik te danke aan RCL Foods Beperk (RCL Foods) se verbeterde resultate in vergelyking met die vorige jaar. Die groei in wesensverdienste is teengewerk deur voorraadherwaardasieverliese in Total SA as gevolg van die skielike daling in die Brent ru-olieprys en die mark-tot-mark verliese van die beleggings in Kagiso Tiso Holdings (KTH).

Wesensverdienste vir die jaar tot 30 Junie 2015 bedra R7 996 miljoen vergeleke met R6 635 miljoen vir die jaar tot 30 Junie 2014, wat 'n styging van 20.5% verteenwoordig, terwyl wesensverdienste per aandeel met 20.3% van 1 292.4 sent tot 1 555.0 sent toegeneem het. Remgro se intrinsieke netto batewaarde per aandeel het met 17.5% vanaf R245.96 op 30 Junie 2014 tot R288.89 op 30 Junie 2015 toegeneem.

Die bydrae tot wesensverdienste deur rapporteringskategorieë word in die tabel hieronder aangebied.

R'miljoen	Jaar geëindig 30 Junie 2015	Verandering %	Jaar geëindig 30 Junie 2014
Voedsel, drank en huishoudelike sorg	1 531	92.6	795
Bankwese	2 845	11.9	2 542
Gesondheidsorg	1 734	16.5	1 489
Versekering	986	13.2	871
Nywerheid	381	(45.6)	700
Infrastruktuur	392	136.1	166
Media en sport	(16)	(125.0)	64
Ander beleggings	84	42.4	59
Sentrale tesourie	111	33.7	83
Ander netto korporatiewe koste	(52)	61.2	(134)
Wesensverdienste	7 996	20.5	6 635

Die **voedsel, drank en huishoudelike** platform het R1 531 miljoen (2014: R795 miljoen) bygedra tot Remgro se wesensverdienste, 'n toename van 92.6%. Hierdie toename is hoofsaaklik die gevolg van 'n hoër bydrae van RCL Foods, wat R755 miljoen tot wesensverdienste bygedra het (2014: R239 miljoen wesensverlies). Daar moet egter op gelet word dat die resultate van RCL Foods vir die jaar onder oorsig ook nou die resultate van TSB insluit, terwyl TSB steeds afsonderlik in die eerste ses maande van die vergelykende jaar verantwoord is. Gedurende die jaar onder oorsig is RCL Foods se resultate gunstig beïnvloed deur Rainbow se nuwe besigheidsmodel ingevolge waarvan afhanklikheid van suiwer kommoditeitslyne

verminder is, sowel as die herstrukturering van sy skuld gedurende die vorige finansiële jaar waardeur die Euro-skuldbriewe met 'n rand-gebaseerde skulpakket vervang is. Laasgenoemde herstrukturering het enige moontlike ongunstige valuta-aanpassings uitgeskakel. Unilever se bydrae tot Remgro se wesensverdiensde het met 4.6% tot R331 miljoen (2014: R347 miljoen) afgeneem. Hierdie afname is hoofsaaklik die gevolg van verhoogde beleggings in handelsmerke en bemerking. Distell se bydrae tot wesensverdiensde, wat die belegging in Capevin Holdings insluit, het R445 miljoen (2014: R495 miljoen) bedra. Hierdie afname is hoofsaaklik die gevolg van 'n gunstige hermeting van R159 miljoen van die voorwaardelike teenprestasie wat met die verkryging van Burn Stewart Distillers Limited in die vergelykende jaar verantwoord is. Uitgesluit hierdie hermeting, sou Distell se bydrae tot Remgro se wesensverdiensde met 0.7% vanaf R442 miljoen toegeneem het.

Die bydrae van die **bankafdeling** tot wesensverdiensde het R2 845 miljoen (2014: R2 542 miljoen) bedra, 'n styging van 11.9%. Beide FirstRand en RMBH het goeie wesensverdiensde-groei van 13.2% en 11.8% onderskeidelik gerapporteer, hoofsaaklik weens goeie groei in beide netto rente- en nie-rente-inkomste by FNB, RMB en WesBank. Hierdie groei is gedeeltelik teengewerk deur 'n klein toename in jaar-op-jaar uitgawes ten opsigte van krediet-waardedalingskoste.

Mediclinic, Remgro se enigste **gesondheidsorg**belegging, se bydrae tot wesensverdiensde was R1 734 miljoen (2014: R1 489 miljoen). Daar moet op gelet word dat Mediclinic se resultate vir die jaar onder oorsig 'n positiewe Switserse vorige jaar belasting aanpassing van R712 miljoen insluit, terwyl die vergelykende tydperk ook 'n eenmalige verstreke dienskoste-krediet en Switserse belasting aanpassings van R303 miljoen ingesluit het. Uitgesluit hierdie eenmalige items sou Mediclinic se bydrae tot Remgro se wesensverdiensde met 5.9% vanaf R1 354 miljoen toegeneem het.

Die bydrae van RMI Holdings, Remgro se **versekerings**belegging, tot wesensverdiensde het met 13.2% tot R986 miljoen verhoog. RMI Holdings het 'n toename van 4.6% in genormaliseerde verdienste gerapporteer, met Discovery en MMI Holdings wat goeie verdienstegroei van onderskeidelik 16.9% en 6.3% behaal het en wat gedeeltelik teengewerk is deur die swakker prestasie van OUTsurance, hoofsaaklik as gevolg van 'n toename in eise weens erge storms in Australië.

Remgro se **nywerheids**belange se bydrae tot wesensverdiensde het met 45.6% afgeneem tot R381 miljoen (2014: R700 miljoen). Total South Africa se bydrae tot Remgro se wesensverdiensde het R133 miljoen bedra (2014: R233 miljoen). Die afname is hoofsaaklik die gevolg van wesentlike ongunstige voorraadherwaardasies in die jaar onder oorsig, vergeleke met gunstige voorraadherwaardasies in die vergelykende jaar. Hierdie herwaardasies is die gevolg van die volatilititeit in die Brent ru-olieprys en die rand wisselkoers. Remgro se deel van KTH se resultate het 'n verlies van R108 miljoen (2014: wins van R71 miljoen) bedra. Gedurende die jaar onder oorsig is KTH se resultate negatief beïnvloed deur die ongunstige billike waarde aanpassing wat verband hou met sy belegging in Exxaro Resources Beperk.

Remgro se grootste **infrastruktuur**belegging is Grindrod. Grindrod se bydrae tot Remgro se wesensverdiensde het R135 miljoen (2014: R108 miljoen) bedra. Hierdie toename was hoofsaaklik weens die sluiting van Grindrod se kommoditeitsverhandeling-afdeling wat swak resultate in die vergelykende jaar gerapporteer het. Gedurende Mei 2015 het die Pembani Remgro Infrastruktuurfonds (PRIF) sy eerste sluiting gehad wat tot gevolg gehad het dat Remgro 'n inkomste-uitkering van R170 miljoen van PRIF ontvang het (hoofsaaklik as gevolg van buitelandse valutawinste gerealiseer in die PRIF-struktuur). Hierdie uitkering, saam met rente-inkomste en verwante belastingkoste, het R177 miljoen tot Remgro se wesensverdiensde bygedra.

Media- en sportbelange bestaan hoofsaaklik uit die belange in Sabido wie se bydrae tot Remgro se wesensverdiensde R69 miljoen (2014: R131 miljoen) bedra het. Hierdie afname is hoofsaaklik die gevolg van wesentlike nuwe besigheidsontwikkelingskoste aangegaan oor die laaste twee jaar (R245 miljoen teenoor R125 miljoen in die vergelykende jaar).

Die bydrae deur die **sentrale tesourie**-afdeling het R111 miljoen (2014: R83 miljoen) bedra. Hierdie toename was hoofsaaklik die gevolg van hoër gemiddelde kontantbalanse en hoër rentekoerse as in die vergelykende jaar. **Ander netto korporatiewe koste** het R52 miljoen (2014: R134 miljoen) bedra. Hierdie afname is die gevolg van 'n netto na-belaste

fasiliterings- en onderskrywingsfooï van R99 miljoen wat van Mediclinic ontvang is rakende die Spire-transaksie en gevolglike regte-uitgifte, deels teengewerk deur transaksie- en finansieringskoste van R38 miljoen wat ook met die Spire-transaksie verband hou en wat van Mediclinic verhaal sal word in die volgende finansiële jaar.

Die mees belangrikste beleggingsaktiwiteit deur Remgro onderneem was die **Mediclinic/Spire Healthcare Group Plc (Spire) transaksie**. Gedurende Junie 2015 het Remgro 'n ooreenkoms met fondse wat deur Cinven bestuur word, aangegaan om 119 923 335 Spire-aandele (gelykstaande aan 'n 29.9%-aandeelhouding in Spire) te bekom teen 'n prys van GBP3.60 per aandeel en 'n totale koopsom van GBP431.7 miljoen (transaksiekoste uitgesluit). Die transaksie is in Julie 2015 afgehandel en is deur 'n kombinasie van Remgro se eie kontant en eksterne fondse gefinansier.

Saam met hierdie transaksie het Remgro en Mediclinic 'n ooreenkoms aangegaan waarvolgens Mediclinic Remgro se belang in Spire sou bekom onderhewig daaraan dat Mediclinic die nodige fondse vir sodanige transaksie werf. In Augustus 2015 het Mediclinic R10.0 miljard gewerf deur 'n regte-uitgifte ingevolge waarvan 111 111 111 nuwe Mediclinic-aandele teen 'n prys van R90.00 per aandeel uitgereik is. Deur sy regte te volg en die balans van die regte-uitgifte te onderskryf, het Remgro 'n bykomende belegging van R4.6 miljard in Mediclinic gemaak. Na die suksesvolle afhandeling van die regte-uitgifte het Mediclinic gedurende Augustus 2015 Remgro se aandeelhouding in Spire teen 'n bedrag van R8.6 miljard, gelykstaande aan die koopprys, asook transaksie- en finansieringskoste, bekom. Remgro het dus effektief net die verkryging van Spire deur Mediclinic gefasiliteer.

Kontant by die kern het met R755 miljoen tot R4 019 miljoen op 30 Junie 2015 toegeneem. Die grootste beleggings gemaak was in Milestone China Opportunities Fund III (R371 miljoen), Unilever (R258 miljoen), RMBH (R216 miljoen), Sabido (R157 miljoen), Grindrod (R58 miljoen), CIVH (R57 miljoen), PTH (R49 miljoen), InVenFin (R30 miljoen) en KTH (R23 miljoen). Die beduidendste belegging verkoop was dié in Longkloof (R83 miljoen) en kapitaaluitkerings ontvang vanaf die Pembani Remgro Infrastructure Fund (PRIF) (R317 miljoen), Milestone III (R110 miljoen) en GEMS (R54 miljoen).

Vir die jaar geëindig 30 Junie 2015, is 'n finale dividend van 259 sent per aandeel verklaar (wat 'n **totale dividend** per aandeel van 428 sent gee) uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde. Hierdie verteenwoordig 'n 10.0% toename vanaf die totale dividend verklaar vir die jaar geëindig 30 Junie 2014 van 389 sent per aandeel. Die tussendividend wat betaal is op 16 Maart 2015 het al die oorblywende SBM krediete benut.

Jannie Durand, hoofuitvoerende beampte van Remgro, sê ter afsluiting: "Die resultate soos gerapporteer deur die meerderheid van ons nywerheids-, infrastruktuur- en mediabelange reflekteer die ware stand van die Suid-Afrikaanse ekonomie. Ons bekommernis dat die verbruiker swaarkry, vererger deur nywerheidstakings in verskeie sleutel ekonomiese sektore was nie ongegrond nie. Remgro se strategie om te belê in nywerhede met 'n soliede rekord en beleggings met bevredigende besigheidsstandaarde, het die groep en sy belanghebbendes tot voordeel gebaat."

Kontak: Remgro Beperk
Jannie Durand ((021) 888-3253)

Uitgereik en versprei deur: Keyter Rech Investor Solutions
Marlize Keyter (083 701 2021)

Uitreikingsdatum: 17 September 2015

JSE kode: REM

Webwerf: www.remgro.com